

Adroddiad i'r Pwyllgor Gwasanaethau Democrataidd

Dyddiad y cyfarfod: 5 Tachwedd 2021

Aelod Arweiniol / Swyddog: **Y Cyngorydd Hugh Evans –
Arweinydd/y Cyngorydd Julian Thompson-Hill, Aelod
Arweiniol Cyllid ac Eiddo**

Awdur yr Adroddiad: **Alan Smith, Pennaeth Gwella Busnes a Moderneiddio /
Gary Williams, Pennaeth y Gyfraith, Adnoddau Dynol a
Gwasanaethau Democrataidd**

Teitl Cynigion i Aelodau fabwysiadu ffyrdd newydd o weithio.

1. Am beth mae'r adroddiad yn sôn?

1.1. Mae'r adroddiad hwn yn crynhoi'r cynigion sy'n deillio o waith Grŵp Tasg a Gorffen yr Aelodau ar Ffyrdd Newydd o Weithio, y bwriedir eu gweithredu ar gyfer y Cyngor newydd yn dilyn yr etholiadau ym mis Mai 2022. Ymdrinnir â dwy elfen yn yr adroddiad hwn: Yn gyntaf, sut ddylai Aelodau gynnal cyfarfodydd ac yn ail, pa gyfarpar TGCh sydd arnynt ei angen i wneud hynny.

2. Beth yw'r rheswm dros lunio'r adroddiad hwn?

2.1. Gofyn i'r Pwyllgor ystyried y cynigion sy'n deillio o waith Grŵp Tasg a Gorffen yr Aelodau ar Ffyrdd Newydd o Weithio a gwneud argymhellion i'r Cyngor ynglŷn â'r modd y dylid cynnal cyfarfodydd yn y dyfodol a pha gyfarpar TGCh y dylid ei ddarparu i'r Aelodau i'w cynorthwyo â hynny.

3. Beth yw'r Argymhellion?

3.1. Bod y Pwyllgor yn gwneud argymhelliad i'r Cyngor ynglŷn â'r dull mwyaf priodol o gynnal gwahanol fathau o gyfarfodydd ar sail y cynigion a gyflwynir yn yr adroddiad a gyflwynwyd i Grŵp Tasg a Gorffen yr Aelodau ar Ffyrdd Newydd o Weithio ac sydd ynghlwm wrth yr adroddiad hwn yn Atodiad 1.

- 3.2. Bod y Pwyllgor yn gwneud argymhelliad i'r Cyngor ynglŷn â pha gyfarpar TGCh y dylid ei ddarparu i Aelodau'r Cyngor newydd fel y nodir yn Adran 2 o'r adroddiad a gyflwynwyd i'r Grŵp ac sydd ynghlwm wrth yr adroddiad hwn yn Atodiad 1.
- 3.3. Bod y Pwyllgor yn gwneud argymhelliad i'r Cyngor y dylid mabwysiadu Protocol ar gyfer cynnal cyfarfodydd hybrid ar yr un telerau i bob pwrpas â'r rhai a nodir yn Atodiad 5 i'r adroddiad hwn.

4. Manylion yr Adroddiad

- 4.1. Ar 19 Hydref 2021 cyfarfu Grŵp Tasg a Gorffen yr Aelodau ar Ffyrdd Newydd o Weithio er mwyn trafod adroddiad ynglŷn â chynigion ar gyfer cynnal cyfarfodydd y Cyngor newydd a'r cyfarpar TGCh y dylid ei ddarparu i'r Aelodau i'w cynorthwyo yn eu gwaith.
- 4.2. Lluniwyd y cynigion hyn mewn ymateb i'r dyhead i adael i fwy o bobl weithio ar-lein a thrwy drefniadau hybrid a fynegwyd yn un o gyfarfodydd blaenorol y grŵp.
- 4.3. Cyflwynwyd adroddiad i'r Grŵp, sydd ynghlwm wrth yr adroddiad hwn yn Atodiad 1. Mae'r ddogfen honno'n rhoi cefndir manwl i'r mater.
- 4.4. Cymeradwyodd y Grŵp y cynigion a nodir yn Atodiad 1 ynglŷn â'r ffyrdd y dylid cynnal cyfarfodydd a'r cyfarpar y dylid ei ddarparu i Aelodau.
- 4.5. Ceir cyfeiriad at brotocol hefyd yn Atodiad 1. Yn anffodus ni fu modd llunio'r Protocol erbyn cyfarfod y Grŵp ond mae Protocol drafft wedi'i lunio bellach sydd ynghlwm wrth yr adroddiad hwn yn Atodiad 2.
- 4.6. Gofynnir i'r Aelodau ystyried manylion y cynigion a nodir yn Atodiad 1 i'r adroddiad hwn ynghyd â'r argymhellion y dylai'r Pwyllgor eu gwneud i'r Cyngor.

5. Sut mae'r penderfyniad yn cyfrannu at y Blaenoriaethau Corfforaethol?

- 5.1. Gallai'r penderfyniad gael effaith gadarnhaol ar y flaenoriaeth sydd a wnelo â'r amgylchedd.

6. Faint fydd hyn yn ei gostio a sut y bydd yn effeithio ar wasanaethau eraill?

6.1. Gan fod gliniaduron yr aelodau'n gymharol newydd mae'n annhebygol y bydd llawer o gostau'n deillio o ddarparu'r rhain. Darperir ffonau symudol drwy'r ddarpariaeth dan gontract ffonau symudol presennol y Cyngor, ac mae hynny'n debygol o fod yn niwtral o ran cost.

7. Beth yw prif gasgliadau'r Asesiad o'r Effaith ar Les?

7.1. Ni chynhaliwyd asesiad effaith yng nghyswllt yr adroddiad hwn.

8. Pa ymgynghoriadau sydd wedi'u cynnal gyda Chraffu ac eraill?

8.1. Ni chynhaliwyd ymgynghoriad gyda Chraffu. Ymgynghorwyd â'r Grŵp Tasg a Gorffen sydd wedi cymeradwyo'r cynigion i'w hystyried gan y Pwyllgor.

9. Datganiad y Prif Swyddog Cyllid

9.1. Fel y nodir yn adran 5, rhagwelir y bydd modd gweithredu'r newidiadau heb newid yn y cyllidebau presennol, ond bydd angen cadw golwg fanwl ar hynny yn y misoedd i ddod.

10. Pa risgiau sydd ac a oes unrhyw beth y gallwn ei wneud i'w lleihau?

10.1. Ceir risg y gellid colli manteision y datblygiadau diweddar mewn technoleg ac arferion cyfarfodydd ar-lein heb fod yno ddull strwythuredig o gynnal cyfarfodydd ar-lein a rhai hybrid, a heb ddarparu cyfarpar digonol i hwyluso'r fath gyfarfodydd.

11. Pŵer i wneud y penderfyniad

11.1. Adran 111 o Ddeddf Llywodraeth Leol 1972

11.2. Adran 47 o Ddeddf Llywodraeth Leol ac Etholiadau (Cymru) 2021